


JAARVERSLAG

2018/2019



We develop the South African Agricultural Industry.
Ons ontwikkel die Suid-Afrikaanse Landbou Industrie.



SENTRUM VAN UITNEMENDHEID
Landelike Veiligheid



Tommie Esterhuyse

Tommie Esterhuyse is die voorsitter van die Sentrum van Uitnemendheid, ondersteun deur Joe Scholtz as ondervoorsitter en Uys van der Westhuijzen as derde dagbestuurslid. Kobus Visser tree op as funksionaris.

Die ernstige veiligheidsbedreiging wat insluit plaasaanvalle en -moorde, asook algemene misdadigheid wat die landbougemeenskap beleef, maak dit noodsaaklik dat Agri SA en sy provinsiale organisasies deurlopend toegewyde aandag hieraan gee. Dit bly die regering se verantwoordelikheid om alle landsburgers veilig te hou, maar weens die huidige veiligheidsbedreiging speel die boerderygemeenskap 'n groter rol in hul eie en ook die gemeenskap se beveiliging.

Die Sentrum van Uitnemendheid se werksaamhede is dus toegespits op veiligheidsaspekte wat 'n uitwerking het op boerderygemeenskappe se persoonlike veiligheid en op algemene misdadigheid.

Die Sentrum van Uitnemendheid fasiliteer Agri SA se beïnvloeding van beleid, wetgewing en programme wat betrekking het op die veiligheid en sekuriteit van boerderygemeenskappe en die landelike omgewing.

Die werksaamhede van die Sentrum van Uitnemendheid word ondersteun deur die Suid-Afrikaanse Polisie (SAPD), Suid-Afrikaanse Nasionale Weermag (SANW), Korrektiewe Dienste, Nasionale Vervolgingsgesag (NVG) en die Instituut vir Sekerheidstudies (ISS), wat gereeld vergaderings van die Sentrum van Uitnemendheid bywoon en insette lewer.

POLISIE-AANGELEENTHEDE

Die Sentrum van Uitnemendheid het verskeie aspekte rakende polisiëring gedurende die verslagtydperk gehanteer, wat die volgende insluit:

Gesprek met Nasionale Kommissaris van Polisie

Die Nasionale Kommissaris van Polisie en sy senior bestuursspan het die eerste vergadering van die komitee bygewoon. By die geleentheid het hy die polisie se omdraaistrategie met die komitee bespreek en gesê dat landelike veiligheid een van die fokusareas in die strategie is. Dit is die polisie se strewe om teen 2030 'n veilige landelike omgewing te skep, sodat die polisie sy grondwetlike verantwoordelikheid kan nakom. Hy het

erkenning aan die boerderygemeenskap gegee vir hul bydrae tot die nasionale ekonomie, asook die rol wat hulle speel in landelike beveiliging deur hulle goed georganiseerde strukture.

Deur verbeterde polisiëring wil die polisie help om 'n veilige landelike gebied te vestig vir ekonomiese ontwikkeling en sodat die boerderygemeenskap kan voortgaan met sy bydrae tot die ekonomie, voedsel-sekerheid en die bevordering van stabiliteit in die land. Die implementering van 'n effektiewe reservistestelsel, die herlewing van landelike spesialiseenhede en die voorsiening van hulpbronne aan landelike polisie-stasies, alles elemente wat die Sentrum van Uitnemendheid deurlopend ondersteun, is deel van die omdraaistrategie.

Vuurwapenwetgewing

In die media is berig dat die polisie beoog om artikel 13 en 14 van die Wet op die Beheer van Vuurwapens te wysig, wat sal beteken dat selfverdediging onder die artikels nie meer 'n geldige rede sal wees om 'n vuurwapen te besit nie. Volgens inligting wat van die polisie ontvang is, bestaan daar nie 'n amptelike standpunt hieroor nie.

Tydens 'n gesprek met die Nasionale Kommissaris van Polisie is die gebrekkige terugvoer wat lede ervaar met appélaansoeke aan hom uitgewys. Alhoewel die Appélaad onder die direkte toesig van die minister van polisie val, het die polisie onderneem om hierdie probleem onder die aandag van die Appélaad te bring. Probleme in dié verband wat aan die kommissaris uitgewys is, is intussen opgelos.

Reservistebeleidsraamwerk

Dit bly die Sentrum van Uitnemendheid se standpunt dat 'n goed funksionerende reservistestelsel, ondersteun deur toepaslike opleiding, 'n voorvereiste vir die landbougemeenskap is om daarby betrokke te raak. Klem word in die hersiene Landelike Beveiligingstrategie, wat nog bekend gestel moet word, geplaas op die belangrike rol wat reserviste sal speel om momentum te gee aan die implementering van die strategie. Daar



is belangstelling by boerelede om daaraan deel te neem, maar implementeringsprobleme moet spoedig moontlik uitgeklaar word.

Die polisie het 'n taakspan saamgestel om aanpassings aan die huidige konsep te oorweeg. Aspekte soos om die praktiese opleidingstydperk van reserviste op te breek in modules om te voorkom dat lede te lank van die plaas af is tydens opleiding, aandag te gee aan werwinguitdagings en die oudit van bestaande reserviste, moet aandag geniet. In terme van opleiding is die hersiene curriculum goedgekeur en word dit tans as deel van 'n loodsprojek geëvalueer. Toepaslike inligting is aan provinsiale organisasies beskikbaar gestel oor die werwing van reserviste, wat op 1 April 2019 begin het.

Herindeling van polisieklusters

Die nuwe klusterstrategie is vanaf 1 November 2018 geïmplementeer met die doel om te bepaal of die polisie hulle doelwitte met polisiëring bereik en om implementeringsprobleme as deel van die proses te hanteer. Die strategie het tot 'n vermindering in klusters gelei en die samevoeging daarvan in gebiedstrukture. 'n Nasionale stuurkomitee is besig om die implementering van die strategie te evalueer en die polisie sal versoek word om by 'n vergadering van die Sentrum van Uitnemendheid later in die jaar hulle bevindinge te deel.

Grondbesettings

Dreigemente oor plaasbesettings bly vir die boerderygemeenskap 'n bron van kommer en die Sentrum van Uitnemendheid sal saam met Agri SA se provinsiale organisasies toesien dat die polisie instruksies oor die hantering van betreding en grondbesettings streng volgens beleid toepas. Om lede by te staan in die vertolking van die beleid en polisie-instruksies, is 'n inligtingsdokument goedgekeur en aan provinsiale organisasies versprei. Die dokument bevat ook riglyne vir lede oor hoe om met plaasbesettings te handel.

“ Om lede by te staan in die vertolking van die beleid en polisie-instruksies, is 'n inligtingsdokument goedgekeur en aan provinsiale organisasies versprei. Die dokument bevat ook riglyne vir lede oor hoe om met plaasbesettings te handel.



'n Versoek is aan die Suid-Afrikaanse Plaaslike Regeringsvereniging (Salga) gerig, waarin die organisasie versoek word om te let op die verantwoordelikheid van plaaslike owerhede om betreding- en grondbesettingsgevalle onmiddellik by die polisie te rapporteer. Indien sulke besettings nie vinnig gehanteer word nie, het dit die potensiaal om oor te spoel na aangrensende boerderygebiede, met die gevolglike negatiewe implikasies vir die grondeienaar. 'n Verdere versoek is nou aan Salga gerig om die aangeleentheid met hulle te bespreek.

LANDELIKE BEVEILIGING

Landelike Beveiligingstrategie

Gedurende die verslagjaar is die bestaande Landelike Beveiligingstrategie hersien. 'n Werkgroep van die Sentrum van Uitnemendheid het insette van Agri SA se provinsiale organisasies oorweeg en daarna sy kommentaar aan die polisie gefinaliseer. Ná afloop van die Landelike Veiligheidsberaad wat deur die departement van landbou, bosbou en visserie gehou is, is verdere werk aan die strategie gedoen, waarna die polisie se strategiese bestuur die strategie in ooreenstemming gebring het met ander nasionale polisiestrategieë. Benewens die strategiese fokus op plaasaanvalle en veediefstal, is die fokus verbreed om ook plaasinfrastruktuurvernietiging as 'n fokusarea in te sluit. Die Sentrum van Uitnemendheid is tevrede dat die oorgrote meerderheid van die komitee se aanbevelings in die hersiene strategie geakkommodeer is.

Die Nasionale Kommissaris van Polisie het Agri SA genooi om saam met die polisie die hersiene Landelike Beveiligingstrategie te finaliseer en betrokke te wees by die reëlins vir die bekendstelling daarvan. Die verwagting is dat die strategie vroeg in die tweede gedeelte van die jaar in die Noordwes-provinsie bekend gestel gaan word, sodra die minister van polisie 'n datum vir die bekendstelling goedgekeur het.

Ooreenkoms met AfriForum

Die ooreenkoms met AfriForum maak voorsiening vir die vestiging van kommunikasiekanale, die uitskakeling van duplisering en 'n onderneming om nie mede-

dingende strukture waar plaaslike veiligheidstrukture reeds bestaan, te vestig nie. Dit bly die Sentrum van Uitnemendheid se standpunt dat 'n groter mate van samewerking op grondvlak moet bestaan om landelike veiligheid effektief te hanteer, sonder om bestaande strukture af te breek. 'n Gesprek het gedurende die verslagjaar met AfriForum plaasgevind, waarin aandag gegee is aan die meer effektiewe kommunikasievloei, veral met grondvlakstrukture. Die betrokkenheid van die polisie by misdaadvoorkomingsaksies op plaaslike vlak, is aan AfriForum uitgewys as 'n vereiste vir lede se deelname.

Plaastoegangsprotokol

Die Landelike Beveiligingstrategie bepaal dat 'n protokol vir toegang tot plase toegepas kan word ter bevordering van landelike veiligheid. Agri SA se protokol in dié verband word wyd aanvaar as 'n geskikte protokol vir die doel. Die komitee het gedurende die verkiesingsjaar die streng en konsekwente toepassing van die plaastoegangsprotokol bevestig en lede versoek om veral gedurende dié tydperk toe te sien dat die protokol toegepas word.

Misdaadbeslagleggingsrekening

Die Sentrum van Uitnemendheid het die Wet op die Voorkoming van Georganiseerde Misdaad (POC-wet) bespreek en hoe dit voorsiening maak vir 'n misdaadbeslagleggingsrekening (Cara - criminal asset recovery account) wat bestuur word deur 'n komitee bestaande uit die departemente van justisie, polisie en finansies. Die fonds is tot die beskikking van wetstoepassingsdepartemente in die staat, waar aansoek gedoen kan word vir befondsing van spesifieke items. Die Nasionale Vervolgingsgesag (NVG) het op versoek van die komitee pro-forma-dokumentasie beskikbaar gemaak, waarvolgens die polisie kan aansoek doen vir fondse uit die rekening. Sodanige dokumentasie is na al die provinsiale organisasies versprei vir verdere hantering.



Tweedehandse Goedere- en Strafwysigingswet, 2015

Die departement van justisie en die polisie se regsafdeling is versoek om wysigings te oorweeg aan die Strafwysigingswet, asook die Tweedehandse Goederewet om die nadelige uitwerking van die toename in plaasinfrastruktuurvernietiging te bekamp. Die polisie, wat verantwoordelik is vir die Tweedehandse Goederewet, is versoek om plaasinfrastruktuur soos besproeiingtoerusting en ysterpale onder skedule een van die wet in te sluit. Verder is versoek dat die kansellering van handelaarsregistrasie van skrooteienaars wat hulle herhaaldelik skuldig maak aan oortredings van die wet, ondersoek moet word met die oog daarop dat sulke eienaars nie weer die geleentheid sal kry om 'n skrootwerf te bedryf nie.

Die polisie, in samewerking met die nasionale sekretariaat van polisie, is tans besig om wysigings aan die wet te oorweeg en die Sentrum van Uitnemendheid het 'n skriftelike versoek aan die polisie gerig vir oorweging.

Die versoek aan die departement van justisie vir die verbreding van die toepassing van die Strafwysigingswet om besproeiingtoerusting in te sluit as essensiële infrastruktuur en voedselproduksie as 'n basiese diens, word tans deur die departement oorweeg. Die verbreding van die toepassing van die wet, indien dit deur die departement goedgekeur word en deur die parlement as 'n wetswysiging aanvaar word, kan lei tot verhoogde strawwe by skuldigbevinding van persone wat hulle aan die misdryf skuldig maak. Die departement het 'n voorlegging voorberei vir oorweging deur die minister vir moontlike wetwysigings.

Koste van misdaad

Gedurende die verslagtydperk is die koste van misdaad in landbou in 'n opname, wat in samewerking met Unisa gedoen is, afgehandel. 'n Verslag is daarna saamgestel, wat daarop dui dat sewe uit tien kommersiële boere wat aan die opname deelgeneem het, misdaad in die een of ander vorm in 2017 ervaar het. Verder het die opname aangetoon dat nagenoeg 'n derde van kommersiële landbou-eenhede 'n toename in misdaadvoorvalle oor die afgelope drie jaar ervaar het. Die resultate beklem-

toon die Sentrum van Uitnemendheid se kommer oor die vlak van misdaad wat deur kommersiële boere ervaar word.



R5,45 miljard

Direkte koste

R2,28 miljard

Vervangingskoste

TOTALE MISDAADVERWANTE KOSTE

R7,72 miljard

Volgens die studie het die totale direkte koste van landbouverwante misdaad R5,45 miljard beloop, met 'n totale vervangingskoste van R2,28 miljard. Die totale landbouverwante koste het R7,7 miljard beloop. Die studie het verder getoon dat die diefstal van lewende hawe bo aan die lys van misdade was, gevolg deur die diefstal van plaasinfrastruktuur, die diefstal van plaasimplemente en -gereedskap, gevolg deur wilddiefstal en roof. Die studie het verder getoon dat ongeveer 40% van kommersiële landbou-eenhede beveiligingtoerusting in 2017 geïnstalleer het teen 'n gemiddelde koste van R115 000 en 'n totale koste van R1,9 miljard.

Die inligting verkry uit die opname is ook gebruikter motivering van die voorstelle vir wysigings aan die Tweedehandse Goederewet, asook die Strafwysigingswet.

Funksionering van Prioriteitskomitees

Op versoek van die Sentrum van Uitnemendheid het die polisie instruksies oor die funksionering van prioriteitskomitees op verskeie vlakke vrygestel. Die instruksie verskaf riglyne aan prioriteitskomitees wat gevolg moet word oor onder meer die voorsitterskap, die inhoud van 'n sakelys en die tipe aspekte wat tydens vergaderings gehanteer moet word. Terugvoer van provinsiale organisasies dui in die algemeen daarop dat prioriteitskomitees goed funksioneer en probleemareas word deurlopend op plaaslike vlak gehanteer.

Erodering van grondvlakveiligheidsstrukture

Tydens die verslagjaar het die Sentrum van Uitnemendheid hom bemoei met die erodering van grondvlakveiligheidsstrukture deur organisasies wat in dorpsgebiede betrokke is by die verskaffing van veiligheid- en sekuriteitsdienste. Hierdie organisasies beweeg nou uit om soortgelyke dienste aan landelike gemeenskappe te bied, wat lei tot konflik en die vernietiging van georganiseerde landbou se plaaslike veiligheidsstrukture. Hierdie optrede kan skade veroorsaak met die implementering van die Landelike Beveiligingsstrategie en optrede deur provinsies bemoeilik wanneer die polisie op daardie vlak uitgesluit word. Die Sentrum van Uitnemendheid het gewaarsku dat daar voortdurend gewaak moet word teen organisasies met 'n politieke mandaat of wat daar gestel is vir 'n persoon se eie gewin.

Ooreenkoms tussen Agri SA en Fidelity ADT

Agri SA het 'n vennootskap met Fidelity ADT aangegaan om 'n reeks dienste en produkte aan sy lede en die landelike gemeenskap te bied in 'n poging om die hoë vlakke van plaasaanvalle en verwante landboumisdade aan te spreek. Deur die Fidelity-dienstegroep word 'n magdom ervaring en sekuriteitskennis aan die landelike kliënt beskikbaar gestel deur die lewering van 'n meer geïntegreerde veiligheids- en sekuriteitsdiens. Die sukses van die ooreenkoms berus op die samewerking met provinsiale organisasies, die boerevereniging, plaaswagte en plaaslike veiligheidsmaatskappye.

Verskeie voorleggings is reeds in die Noord-Kaap, Vrystaat en Oos-Kaap gedoen oor hoe die dienste en produkte van Fidelity benut kan word om groter veiligheid te bewerkstellig. Die vennootskap sal daarna strew om 'n groter bydrae te lewer om 'n veiliger landelike omgewing daar te stel en te reageer op die veiligheidsbehoefes van die landelike boerderygemeenskap.

Verkiesingsprotokol

Die Sentrum van Uitnemendheid werk sedert 2006 met die Onafhanklike Verkiesingskommissie (OVK) saam

om ordelike toegang aan die OVK te verleen om plase te besoek vir kieseropleiding en die vestiging van kieslokale. Agri SA het reeds in Desember 2018 'n gesprek met die OVK gevoer rakende 'n verkiesingsprotokol vir die 2019-verkiesing. Die gesprek is opgevolg met 'n brief waarin Agri SA sy standpunt duidelik stel. In die afwesigheid van 'n finale protokol vir 2019, het die Sentrum van Uitnemendheid die volgende standpunte gehandhaaf vir implementering deur lede, naamlik dat lede voorsiening moet maak:

- Om redelike toegang aan die OVK en sy agente te bied tot boerderygebiede om hulle werk te verrig in terme van kieserregistrasie en -opleiding;
- Om kiesers die geleentheid te bied om politieke byeenkomste by publieke plekke by te woon wat deur politieke partye gereël word;
- Om toegang aan die OVK en sy agente te bied om plekke te gebruik as registrasie- en stemlokale, waar toepaslik; en
- Om te verseker dat besoeke aan plase sal plaasvind in terme van die protokol vir toegang tot plase.

Voorlegging aan portefeuljekomitees

Die Sentrum van Uitnemendheid het gedurende November 2018 die geleentheid gehad om 'n voorlegging te doen aan 'n gesamentlike sitting van die portefeuljekomitees van polisie, asook landbou, bosbou en visserye. Tydens die voorlegging is die portefeuljekomitees ingelig oor die nadelige uitwerking wat plaasaanvalle en ander misdade op die landbougemeenskap het. Die hersiening van die Landelike Beveiligingsstrategie is verwelkom en klem is gelê dat 'n goed funksionerende prioriteitskomiteestelsel, asook 'n toeganklike reservistestelsel die fundamente van die strategie is. Agri SA het hom weer eens verbind tot goeie samewerking met die polisie, vir die bevordering van landelike veiligheid.



“ *Die hersiening van die Landelike Beveiligingsstrategie is verwelkom en klem is gelê dat 'n goed funksionerende prioriteitskomiteestelsel, asook 'n toeganklike reservistestelsel die fundamente van die strategie is.*

Nasionale Non-Ferrous Crime Combatting-komitee

Die voorsitter en funksionaris van die sentrum verteenwoordig Agri SA in die Non-Ferrous Crime Combatting-komitee. Tydens een van die komitee se vergaderings is 'n voorlegging gedoen rakende die uitwerking van die diefstal en vernietiging van plaasinfrastruktuur op landbou. 'n Versoek is ook gerig vir 'n spesiale ondersoek na die diefstal van selfoontoringbatterye. Die polisie is tans besig met spesiale projekte op grondvlak om die diefstal van selfoontoringbatterye te voorkom.

KORREKTIEWE DIENSTE

Die minister van korrektiewe dienste beoog 'n hersiening van die huidige paroolstelsel en aanbevelings daarvoor is aan die minister deur die departement gedoen. Die terugvoering van die minister oor die hersiening van die paroolstelsel word tans afgewag.

Die kontrakte van die huidige paroolrade het aan die einde van Julie 2018 verval. Nuwe kontrakte is met lede van die paroolrade gesluit, wat op 1 Maart 2019 in werking getree het vir 'n periode van drie jaar. Lede van georganiseerde landbou wat wil deelneem aan 'n paroolraad se verrigtinge, kan by die voorsittende beampte daarvoor aansoek doen. Die polisie word ook nou betrek in paroolrade, met goeie ondersteuning en samewerking wat verkry word.

NASIONALE VERVOLGINGSGESAG

Die Nasionale Vervolgingsgesag (NVG) gaan voort met die opleiding van staatsaanklaers in die hantering van veediefstalsake, maar begrotingbeperkings maak dit moeilik om daarmee vol te hou. Dit bly 'n deurlopende proses, waarmee die NVG sal voortgaan sodra hul begrotingsprobleme uitgesorteer is. Die aanstelling van nuwe staatsaanklaers is ook vertraag weens begrotingbeperkings, veral gesien teen die agtergrond van die toename in staatsaanklaers wat die NVG se diens verlaat.

VEEDIEFSTAL

Volgens die Nasionale Veediefstaleenheid is die provinsies wat die meeste geraak word deur veediefstal die Oos-Kaap, KwaZulu-Natal en die Vrystaat. Die volgende inligting word met die komitee gedeel rakende veediefstal:

- 30 polisiestasies dra by tot die hoogste voorkoms van veediefstal in die land;
- Daar is 'n toename in die aantal diere wat teruggevind word;
- Die aantal skuldigbevindings neem toe en meer sake is die afgelope jaar gerapporteer as die vorige jaar; en
- Verskeie beskuldigdes is vanjaar reeds tot effektiewe tronkstraf gevonniss, waarvan verskeie tot 15 jaar tronkstraf opgelê is.

Die volgende aspekte is uitgelig:

- Sommige veediefstaleenhede ervaar 'n tekort aan nagsigtoerusting, maar geen versoeke in dié verband is deur die Veediefstalvoorkomingsforum of Nasionale Veediefstaleenheid ontvang nie;
- Die toekenning van analiste om die skakeling tussen sindikate en georganiseerde misdaad in veediefstal te ondersoek, is nodig. Die polisie meld dat hulle in die proses is om so 'n kapasiteit te vestig by die eenheid vir georganiseerde misdaad en dat verskeie projekte geregistreer is om veediefstalsake te ondersoek;

- 'n Uitdaging bestaan by sommige veediefstal-eenhede wat 'n tekort aan voertuie en mannekrag ervaar. Dit is egter die veediefstakoördineerder se verantwoordelikheid om addisionele behoeftes te bepaal en dit volgens die toepaslike kanaal in te dien;
- Daar is verskeie gevalle waar 'n J-543 uitgereik word, maar weer in die hof teruggetrek word. 'n Dossier behoort geopen te word vir herhaalde oortreders sodat hulle vervolgd kan word. Die aangeleentheid is tydens 'n vergadering van bevelvoerders bespreek; en
- Die Lesotho-grens bied verskeie veiligheidsuitdagings vir boere en polisiestasies aan die grens. Die stasies behoort oor voldoende kapasiteit te beskik sodat hulle die misdadaadsituasie aan die grens effektief kan hanteer. Die behoeftes van polisiestasies word bepaal deur 'n lewensvatbaarheidstudie van die polisie wat onderneem moet word, wat dan die behoefte sal uitwys waarvolgens toekennings gemaak sal word.

Dank is deur die Sentrum van Uitnemendheid uitgespreek teenoor die Veediefstaleenheid vir die werk wat hulle doen.

WEERMAG-AANGELEENTHEDE

Die Suid-Afrikaanse Nasionale Weermag is verantwoordelik vir die operasionele gebied wat insluit die internasionale grense en die 10 km-grondgebied van die grens. Die totale internasionale grens is 4 471 km en word bedien deur 15 weermagsub-eenhede met 2 754 manskappe wat aan die grensgebied ontplooi is.

AFSLUITING

Die komitee het onderstaande uittreksel uit die *Sunday Times* van 10 Maart 2019 gebruik om daarop te wys dat indien negatiewe gedrag nie aangespreek word nie, die probleem altyd sal bly voortbestaan;

“Bad behaviour or a culture of impunity is changed or reversed by a strick application of consequences. The burning of universities, for instance, which insidently started in the Northwest, has not abated, because there has been no consequences. It was a shock when it happened the first time. We can have as many summits and commissions of enquiry, but we'll have wasted our time if nobody is finally call to account. Amid all the verbiage about clean-up campaigns, towards assuredly missing: don't litter. Consequences are what's missing and leadership to enforce them”.

ERKENNING

Lede van die boerderygemeenskap, provinsiale affiliasies, asook veiligheidsverteenwoordigers, wat op verskeie vlakke bydraes lewer om die veiligheid van landelike gemeenskappe te verseker, verdien erkenning en waardering.

'n Besondere woord van dank aan die Suid-Afrikaanse Nasionale Weermag (SANW), die Suid-Afrikaanse Polisie (SAPD), die Nasionale Vervolgingsgesag (NVG), Korrektiewe Dienste, en die Instituut vir Sekerheidstudies vir hulle ondersteuning aan die komitee in sy poging om landelike veiligheid te bevorder.

